



聖宋名賢五百家播芳大全文粹卷七

賀表

賀紹熙改元表

陳君舉

一元之建雖曰舊章二美之并茲惟盛事

中賀竊以

策書所記年號則多有以守成而愧揖遜之君至于
更化則非沿襲之意未若二聖親傳於大寶兩朝見
著于隆名播告多方越踰前古恭惟 皇帝陛下審
時所上親政于初遠惟紹大業之難近思熙庶績之



廣聿稽堯舜之典合為禹謨奄有夏商之年布在周
歷臣繆持使節欽誦詔書協時月正日敢有不恭道
德意志慮愧非其任

賀改元表

林少穎

准唐室正元之規示謹嚴于正始用孔聖春秋之法
重改作于踰年考古驗今體元立極鴻名所錫鼇抃
攸同臣某中謝恭惟 皇帝陛下廣運聖神狗齊膚
敏先受廷闈之訓誕膺歷數之歸濬哲惟商遠接建

隆之皇統重華協帝親奉紹興之宸謨迺集大成以
都顯號有秩斯祐無疆惟休臣遠乘使輶肇膺紹綽
金聲玉振既逢條貫兼總之初霧塞飈回願覩謀謨
咸賀之盛臣無任

賀改元表

趙德莊

履端於始方介壽於兩宮謂一為元用同文於四表
詔音誕布品物均驩中賀竊以天作高山億萬年而
不拔龍飛白水二百載以中興啟祐昌辰若稽成憲

兼舉鴻名之懿一標鳳紀之新歲有虞上日之儀王
春無外符正觀元正之義聖孝彌光恭惟 皇帝陛
下清明在躬勉強行道南鄉三遜歷數自歸五日一
朝德教而饗法乾行而利見觀泰象以財成爰因卜
年明示初政規摹宏遠聳夷夏之前聞光訓答揚極
子孫之茂烈臣濫宣寬大親際休明告以昭時竊仰
三朝之盛授茲神筮願占九會之期

賀改元表

李成季

神休沓至昭示聖時歲號更新欽承天意布宣萬國
鼓舞羣情 中賀恭惟 皇帝陛下 一德咸通三靈眷
佑諸福之應緣類而來明照下土則神光燭天澤潤
生民則甘露如雨欲付以享邦之慶又申以受命之
符皆前世所罕聞不踰時而來上載諸簡冊播之聲
詩猶未足著無窮之傳復何以表非常之貺大將詔
世宜重紀元太史編年無愧祖宗之美明堂頒歷永
同天地之期

賀南郊禮成表

劉莘老

聖人能饗熙事備成皇矣顧懷墮擁肇禋之福沛然
敷錫肆均大賚之恩恭惟 皇帝陛下凝命乾剛重
熙離照西清訪道學緝于光明東朝致恭孝通乎上
下以小愆之心求助以鳧鷖之道守成謂大祀之重
五經謹始郊以見上帝朝薦真館裸告太宮候長日
以道迎肅圓丘而陟降百神之靈受記諸福之物致
祥宣室儲精既逆釐于三極端闡煥號俾作解于羣

方仁人有生歡通無外臣叨蕃宣之任布寬大之書
執玉甘泉莫効駿奔之力馳心魏闕獲同慶賚之私
鼓舞昌辰百倍常品

賀南郊禮成表

王禹玉

今月二十八日南郊禮畢者伏以奠玉告虔已嚴于
郊報鳴鑾入蹕方慶于禮成歲蕤盛容鼓舞羣動恭
惟 皇帝陛下德躋邃古仁詡函生包九乾之粹剛
蹈三后之謨烈兵偃民靖時登物蕃詔推筴以迎長

卜就陽而拜貺夙戒容衛稽參典文廼齋紫闈於薦
清廟加真聖之丕謚循先朝之舊章遂升泰壇以類
上帝皇邸之設紫烟之蟠樂備而六變成禮交而百
神格羣辟在位萬符發祥擁天之休與物均慶因
追孝之誠盡事神之志通太平之儀振古無讓臣
幸逢盛旦職忝侍祠瞻能事之畢修浹輿情而同抃

代賀南郊禮成表

韓无咎

泰壇修報寶厯迎長惠浹百神歌均四海恭惟 皇

帝陛下仁如天地德類祖宗年穀屢豐馨香薦于至
治禮樂大備形聲協于泰和惟茲上帝之博臨式見
聖人之能饗合洽允塞益顯從周之文並侑孔嚴光
昭復禹之盛臣屬叨假節阻預奉璋聆熙事之脩成
惟深抃舞布詔書之寬大彌切欽承

代皇子賀北郊禮成表

張全真

翠華就次極帝意之寅恭黃玉奠方仰靈心之嘉饗
備成懿典同切歡悰 中賀 恭惟 皇帝陛下膺命溥

將凝謀丕顯天地明察達禮樂之中和中外辨嚴歲
威容之祿盛臣居慙弱植祇覲上儀雖微顯相之勤
均賴榮懷之慶

朱夏適中飭屬車而嚴辨方丘歲事欣盛禮之嘉成
靈祇晏娛寰海呼舞中賀恭惟 皇帝陛下宅中立
極正厯握符道兼于天幹萬邦而獨化祭重于地謹
三歲之親祠臣屬忝天支親逢聖旦覲文明而竊抃
慶福祚之增隆

離明御治極聖孝以寧神坤載親祠接神娛而竣事
靈祇散祐海宇歡康中賀恭惟 皇帝陛下道配二
儀化馳九有克禋克祀勤天步于六飛來燕來宜識
颯游于八變臣猥慙弱植親遇聖時仰綍典之嘉成
激懦衷而抃躍

至日躬祠秩上儀而蒐舉方丘竣事仰協氣之流通
神人協和內外交慶中賀恭惟 皇帝陛下道高太
極孝格羣神樂奏樅金已備函鐘之八變禮成奠玉

想聞喬嶽之三呼臣謬託璿源獲觀縟禮莫預鴈行
之列第深螽躍之誠

萬物資生禮不忘于本始百神受職誠自決于幽明
嘉事休成湛恩汪中賀恭惟 皇帝陛下道侔坤

載明並日升泰折親祠內盡志而外盡物靈祇昭答
山出車而河出圖臣仰托素臨莫陪顯相祇覲文明
之化第深鼓舞之誠

賀北郊禮成表

汪彥章

講頌祇之美報修宗祖之上儀天蹕順從海隅胥悅

中賀恭惟 皇帝陛下德業淵妙精成靜專踵行三

歲之祠並答兩儀之貺謁歎郊時修明國章地求習
坎之方物取上黃之象合於經誼黜汾睢就祭之文
揆厥本原追神考欲行之志臣幸當初學親覩祲容
聞熙事之告成與外朝而同慶

賀北郊禮成表

孫仲益

肇裡吉土涓日至之休成昭格柔祇報坤元之博厚

允膺並貺丕顯顧懷中賀竊以求象類於陰陽致明
察於天地三代受命興嚴肆祀之常兩漢卜郊乃有
合法之禮洪惟永裕駿發德音邁上聖之勃興刺六
經而制作交靈心於祇預允答資生伸母事之至誠
聿崇親享舞咸池以合晟樂飭齊輅以建太常坡陞
兩城合於耦數尊壘制寵厥含章哀對百神因崇
正於方澤作為六品奠嘉王之黃琮用能風雨弗違
星緯咸叙充嘉氣之重宇燭榮光於嚮辰神人以和

祖考咸格薦祭如在畢圭幣瘞埋之儀盼享來臨致
正陵羸介之物陛下欽承駿命祇翼貽謀蒐舉十載
之闕遺折衷諸儒之稽攷斷自睿意發揮禋容臣等
預覲齊明叨陪陟降率時昭考輯曠世之彌文於赫
湯孫繼自而作古

賀北郊地示示見表

孫仲益

伏覩五月某日夏至前日陰曠是夜皇帝宿齋星宿
明煥暨至行禮空中有神物旌旗光景示現精意以

享天地之嚴恭受命咸宜應乾元之昭答清衷所嚮
瑞應聿懷 陛下講三代久闕之儀飭千載難行之
典肇稱美報以答嘉生求比象於兩儀制惟新之百
禮肆愔宗惟我元祀肇舉黃琮用肅恭於爾明神躬
祠方澤乃者宿齊祇祓星緯煥明將事載陰風雲隱
晦出郊灑道具瞻零雨之濛効駕還宮始沛隨車之
澤矧乃薦牲奠玉恍若來臨飲酢受釐惕然如覩至
陰肅肅氛祲出於崇丘蘊隆蟲蟲靈光燭於區宇萬

舞有奕八變告成咸秩無文爰致羸物事地以察山
林川澤之効珍先天不違雨暘寒煥之咸若臣等參
陪陟降預覲嘉祥祝史無求福祿自至豈止膺天祇
之景貺迄用康年固宜禪梁父以報功永言配命

賀明堂禮成表

王介甫

蒐講上儀神天祇豫敷施大號夷夏交欣 中賀蓋聞
聖以享帝為難孝以嚴父為至周右烈考或委政而
弗專漢祀諸神或竊禮而無實恭惟 皇帝陛下道

包眾甫運會丕平巍巍成功堯之所謂大業業致孝
舜之所由昌涓選休辰肇稱嘉享百禮既至而正惟
已獨萬壽攸酢而福與眾均臣久冒眷憐方嬰疾
奉承籩豆乃獨後於臣工踰舞笙鏞竊自同於鳥獸

賀明堂禮成表

曾子固

昊天無聲之載人莫能名先帝罔極之恩物何以稱
維總章之定位秩宗祀之洪儀可薦至誠用伸昭報
中賀伏惟 皇帝陛下躬夙承之聖質而博古多聞

經特起之大猷而虛心廣覽振千齡之墜緒紹三代
之遐縱霈澤之所涵濡太和之所煦嫗華夏蠻貊無
一夫不獲其宜草木蟲魚無一物不遂其所爰求祭
典用告王功蓋諸儒之說為不經則折衷於孔子而
近世之事為非古則取法於周公罷黜異端推明極
孝以尊莫大於祖故郊於吉土以配天以本莫重於
親故享於合宮以配帝恩義兩得其當情文皆盡其
祥徹俎云初均釐甚廣昭哉皇矣實難偶之昌期巍

乎煥焉信非常之盛禮臣幸逢熙洽未奉燕間一違
前蹕之音四偶親祠之慶青雲多士皆預橋門之聽
觀黃髮孤生獨歎周南之留滯

賀明堂禮成表

汪彥章

夙涓剛日祇見合宮誠意上孚色動房心之次靈釐
下被恩均輝翟之餘作民恭先惟神是克中賀恭惟
皇帝陛下靈承天地光昭祖宗具綿蕤於曲臺懋
建中和之極燔柴於吉土允符精禋之交幸託宗

枝獲承慈蔭聞神祇之昭格與民庶以交欣

賀明堂禮成表

張全真

清蹕時巡深軫四方之多事合宮大享恪遵三歲之
彛章誠既格而神娛慶遂行而民賴中賀臣聞禮或
隆而或殺祀有報而有祈屬羯胡之肆行致容典之
幾墜未暇備隆於百禮特殺其文雖曰大報於三神
以祈為主爰舉紹興之近制實遵皇祐之成謨天地
合法祖宗並侑聖明之能述作盡洗拘攣衷正以昭

馨香自膺顧享恭惟 皇帝陛下生知恭儉躬履艱
危菲禹食以寧神土堯階而率下齊明盛服蒐講上
儀五室九筵制就嚴於路寢三牲八簋誠自接於高
靈臣忝帷幃之舊臣備藩垣之煩使再逢熙旦獨遠
周行餽事受釐莫贊鬼神之間疏恩作解獲沾雷雨
之施

賀明堂禮成表

肆觀東后方躬五載之巡平秩西成不忘九室之饗

人心感豫天眷昭回中賀恭惟 皇帝陛下增光祖
宗再造區宇我將我享爰蒐講於上儀有壬有林用
綏懷於列辟簫管備舉籩豆靜嘉神之格思終掃平
於大憇民亦勞止咸仰戴於中興勃然成功高出振
古臣頃辭文陞冒領守符駿奔走於下塵莫陪盛禮
樂中和於遠域徒積歡心

賀明堂禮成表

王禹玉

今月二十七日大享明堂禮畢者伏惟王者布政實

歡太室之居惟聖人享親莫隆上古之配屬本朝之
盛際講三代之潤儀涵濡太和鼓躍羣動恭惟 皇
帝陛下撫中天之運躬上聖之姿懷祖宗之靈霜露
以之怵惕事天地之重夙夜罔或怠遑謂欽柴之祈
數已見于郊廟而合宮之享獨未報于案盛適涓季
秋咸秩羣祀故已來諸福之物交三靈之歡既親事
于几筵遂還御于親闕渙發大號恩覃有生念人之
孝則廣陋泉之封恤民之老則賜養老之具斯誠帝

王之盛德邦家之鴻休臣某等生逢盛時晚綴嚴近
聞舜韶之美既參百舞之儀登春臺之和更洽羣歡
之至

代皇子賀親蠶禮成表五道 張全真

德茂刑家播徽音于椒禁政先敦本歲盛禮于桑壇
中賀恭惟 皇帝陛下仁以厚民治惟稽古乃至禕
綸之重不忘織社之勞臣猥以弱齡覲茲鉅典王化
自近已大竦于觀瞻民生在勤當不煩于勸課

治本勤儉禮載行於織室化孚觀聽歡遂決于縣區
中賀恭惟 皇帝陛下德以身先治由近始帝藉既
終于千畝公桑復始于三條臣託迹慈闈分封外壤
鞠衣從事欣瞻三灑之儀紅女勸功行奉八縣之貢
治本農桑爰著躬行之實禮成宮壺聿觀神化之馳
中賀恭惟 皇帝陛下德茂勤邦仁深厚下載講蠶
宮之事增嚴龍袞之華臣胙土藩方托身宸極三宮
布繭已瞻陰教之修五畝植桑更卜民財之裕

載開帝籍既終一壘之功從事公桑申講三條之禮

中賀恭惟 皇帝陛下若稽舊典敦勸庶邦粵季春
之吉辰示長秋之懿德臣猥緣穉齒欣覲上儀繭館
獻功行慶三宮之布絲人載績更新五采之施

負宸端朝坐闡不言之教載鉤就室用彰敦本之仁
中賀恭惟 皇帝陛下恭儉愛人欽明若古曾是椒
宮之懿不忘繭館之勤臣早被皇慈親逢盛禮織紅
組紉庸是勸于女功朱綠玄黃仁克成于帝服

賀東封禮畢表

張乖崖

臣某言今月六日密院遞到赦書一道十月二十六日皇帝封禪禮畢大赦天下者臣當時集軍州官吏僧道百姓曉諭訖伏以真聖有作萬方樂推非升中無以告不世之功非太平無以行希代之事盛禮云畢鴻休允敷極于無垠不任大慶

中謝臣聞安大

眾定大業者至德動天地感鬼神者至誠至誠昭晰以發中玄化浸淫而應外然後五兵消偃九有澄清

迨于升聞克洽穹昊若夫守治定之禮修報本之儀常祀之餘盛典多默自前世稱頌者七十二君漢纔依稀唐亦梗槩以至躋生民于壽域納仁義于中途踵無懷因嚴之風述虞舜東巡之美系我聖宋成乎嗣君恭惟皇帝陛下大道之尊中天而立咨唐堯之宇覆法姬周之砥平密勿萬機臣度遵于繩準精明一德黎元但覺其昭蘇加以天資孝慈則人歸恭順力行節儉則物有羨饒和氣四克百穀屢稔戎

狄不召而自至禎祥過抑而益彰有以光揚祖宗輝
映今古善頌之口何得而名于是遐方觀國之賓奔
馳道路東魯系來之老萃集闕庭泊于黔首緇黃三
事庶尹累陳昌平之績請行封禪之禮皆曰陛下德
至于天故有祥符降空羣鶴引駕德至于地故有嘉
木連理芝草分莖昭示眾靈無以殫記陛下果不可
固讓人情果不可固違者上答神休下祈民福也是
用降時巡之詔者柴望之儀馳道不除帷宮不飭菲

薄之至也無勞居民無天生物仁愛之深也皇皇翠
華駸駸羽衛方冬之麗日增燠千里之纖埃不飛既
祇肅以登封復懇惻以降禪奠茅成禮雖資北里之
禾檢玉報功實有上玄之命是謂禱祈之善恭讓于
天曠蕩之恩宏被于下無一事不更于照臨無一物
不遂于霑濡熙穆淳風輝煥清世追縱五后式觀紀
號之文邁德宗周更遠卜年之數臣職叨近列任忝
名藩逢大中開泰之期見往代未行之事病知分薄

雖伸扈蹕之心老覺才微莫建歌虞之意云云

賀郊祀改元肆赦表

行會通之禮肇三歲之明禋下寬大之書新一元之美號熙事允成於上日湛恩誕布於中風竊以祀天地者國家之盛儀法祖宗者帝王之能事仰惟上聖順攷神謨肇祀改元遵藝祖乾德之制卜郊遷日法太宗至道之規前列用光孫謀惟永恭惟皇帝陛下秉圖御籙體道乘乾歷數在躬當圜丘之美報靈

夷猾夏偶外闡之戒嚴申誦日以致虔俄動天而昭監倒戈不用和戎狄以正諸華啟蟄而郊執圭幣以見上帝夕烽滅照柴燎告升春澤發生震雷作解與生靈而更始改正朔以承天保合太和永受厥福臣職分偏壘身遠外朝啟運千齡仰慶朝元之用九舉觴萬壽阻陪嵩嶽之呼三

賀南郊赦表

曾文肅

繼體守文既日躋於聖敬報本反始式昭事於昊穹

翕受百神之釐敷為四海之澤渙號揚於中外湛恩
洽於幅員臣某中賀竊以洪覆難諶惟聖人為能饗
齋明以祀示天子必有尊用陶匏藁秸以稱其誠備
鑾輅袞龍以致其美紫壇八觚而天位定黃鐘六變
而神貺交蓋發祥隕祉所以為民故赦過宥罪與之
均福矧丕承於寶祚方躬見乎圜丘肇禋有成時肆
大賚至於蠲金穀之負深恤里之昭天漏泉
汪洋乎其無間垂髻戴白鼓舞乎所未聞歡聲

茲蓋伏遇 皇帝陛下宅心寅畏凝命穆
清率昭考以思王業之艱難惠宗工以奉孫謀之燕
翼樂休成于熙事推慶施於函生臣假守邊藩親逢
盛際莫陪多士奉璋之列實同斯民擊壤之歌

賀南郊赦表

王介甫

精意上昭神靈底豫茂恩旁暢夷夏接和臣某中賀
臣聞道以饗帝為難禮以配天為主有秩斯祜唯四
表以歡心胡臭亶時匪九州之美味自古在昔若聖

與仁厥遭昌辰乃覩熙事恭惟 皇帝陛下邁種三
德敷奏九功率籲奉璋之眾髦肇稱奠璧之新禮廟
邁致孝郊血告幽誠既格於穹昊福遂均於品庶振
憂矜寡原宥青莪第五玉以褒封善人是富發三錢
而慶賜賤者不虛天其居歆人以呼舞臣夙叨寵獎
親值休成雖無預於駿奔實不勝於竊抃

賀南郊赦表

王禹偁

臣某言今月二十日降到赦書一道南郊禮畢大赦

天下者臣當時集軍州官吏百姓僧道宣讀施行訖
嚴父配天王者之達孝青災肆赦有國之大猷凡在
羣生罔不同慶臣聞有虞尚乎德祖顓頊而宗堯周
人重其先禘帝嚳而郊稷沿革之文則異祠祀之義
斯同率由舊章茲曰大事雖天子必有尊也非聖人
孰能行之伏惟 尊號皇帝陛下司牧黎元敦崇孝
治言有父也宣祖昭武皇帝積德而累功言有兄也
太祖神德皇帝開基而創業繼志惟謹守文則難化

成而日用不知寅畏而夕惕若厲故得昆蟲咸遂戒
狄允懷文物聲明損益乎三代道德仁義寔染乎萬
民有是聖功推功於天地有是聖德遜德於祖宗乃
備嚴禋聿伸大報禮樂具舉豈三年之不為玉帛載
馳見四海之助祭列聖至上上帝格思錫鴻休於無
疆明大孝之不匱禮成而退天且不違自非吉蠲之
誠達於上下孝悌之至通於神明孰能若斯其盛歟
由是固純嘏之休覃雷同之澤謂萬方有罪於是乎

釋縲紲之人謂百姓不足於是乎逸逋逃之賦照燭
幽壤滌蕩瑕疵順天推恩與物更始詩不云乎一人
有慶經不云乎萬國歡心自可追三王而比崇非止
黜五霸而不用者矣臣出官內署承乏專城既不得
陪冠劍之班行俎豆之事舞抃於黃道登降於紫壇
又不得湧非烟之詞濡甘露之筆藻繪於玉冊發揮
於皇謀亦臣之不幸也然而當求治之朝居分憂之
任得不導揚兌澤訓戒齊民瘳其瘡痍浸入骨髓亦

臣之大幸也伏限郡事不獲奔詣闕庭臣無任

賀南郊赦表

宋子京

臣某言今日日馬遞到赦書一道以南郊禮畢大赦天下臣當時集本州官吏軍民宣讀并下管内諸縣寨施行訖者帝儀訖饗朝渙推慈飛驛疾傳庶邦叢慶竊以天郊之重國制有常凡萬乘躬行必三歲間往不煩不怠由列聖而持循以妥以虔合諸神而裒對睿圖累盛縟典勤修恭惟 皇帝陛下纂大合華

漑中布度抵金璧之玩率儉示人收霜電之嚴措刑于下克勸明德格于皇穹交熏太和冒我羣品顧懷時億瑞應日來亟歲上儀若祗舊典戒期百執頒詔九州曳雲罕之常羊服翠蚪之半漢殊庭一獻清祀徧躋遂自陽靈之宮往會天元之旦羽旄四合垓陞參登上璧左琮之華合祛而信祝祖蒞宗題之次更侑而迭嘗拜嘉祚于席垂烈欽柴于雲表靈心合會熙典備成然後還坐中天之闈普肆墮風之澤改頒

大號崇冠初元昭神之祥祈命惟永賞功赦罪已責
逮瘼咸與惟新牖民衷而遷善聿懷多福導帝祉以
區盛際有光彞倫咸賴臣嚮觀舊史殫見往朝或
不愛牲玉為恭殊非明薦或所過祖賦為復蓋出重
勞語昔罕全訂今絕擬所恨清塵在望自苦周南之
留紫橐仍持不與甘泉之從第班恩諭均泆歡悰

賀南郊赦表

宋子京

臣某言今月八日馬遞到赦書一道以南郊禮畢大

赦天下者臣當時集本州官吏軍民宣讀并下管内
諸縣寨施行訖嚴燎煬薰翠輿旋軫慶騰觀魏歡泆
黎苗竊惟報本以誠奠尊響帝就陽而祀是謂因天
有國以來三歲為法合萬靈而股享窮四海以職來
垂茲治平用舉能事恭惟 皇帝陛下丕承正統奄
治中區惟古與稽有典咸秩既揚詡萬物乃嘉享三
神前會諸儒討定新樂俄頒制詔悉侑聖真謂周以
后稷祀郊祖而忘考唐引睿宗配地親而未尊參對

上神自我為古推處大孝卓冠彛倫爰卜景至之初
克申躬見之禮三后居左自外止則匹行兩儀位中
由天明則地察壘豆惟旅簫石告諧袞馨德于神衷
委純祺于霄極萬乘淵默百禮休成茂對剛辰用肆
大青揭日破葑注海濯搬纍係有更生之歡廢錮得
自新之路賞幣丘垤屯旅藻鳧歡驛疾馳不崇朝而
徧羣心保合置天下于安臣適獲窮邊阻觀鉅典惟
軍旅而未之學久塵攝帥之行知鬼神之所以然方

隔受釐之問姑宣上德明諭遐眚

賀南郊赦表

田表聖

臣錫言于洺州伏覩今月十七日赦文南郊禮畢者
禮盛嚴禋恩覃在宥凡樂文明之化寔勝舞蹈之歡

中謝 伏惟 應運統天睿文英武大聖主明廣孝皇

帝陛下聖德日新睿謀天縱晉越既歸于土宇華夷
遂混于車書貞觀太平未侔今日開元無事豈及此
時公卿既上于鴻名玉帛爰新于典祀一陽來復隨

德澤以融和肆赦從寬霈恩波而滌蕩幽囚盡釋逋
欠咸蠲軍功示悅賞之誠戎莽布懷來之信贈加封
樹封及閨闈遷客官資復以出綸之命遠人家屬遂
其懷土之心念切先厚於策勲恤物下周於掩骼連
山觀象既符作解之恩率土歡心大慶禋宗之禮臣
限拘所職不獲奔詣闕庭

賀南郊赦表

田表聖

臣錫言今月五日伏覩制書南郊禮畢改元大赦者

臣已晝時宣諭訖伏以郊廟享薦神人以和至誠既
達于圓穹慶賞遂周于率土覆載之內抃躍皆同

中

謝伏惟 皇帝陛下端拱無為太平已致兆庶既躋
於富壽萬靈方效於禎祥所以祀天報光大之功為
民禱豐穰之福升禋纜畢惠澤旁流囹圄久空仍布
青災之令萑蒲無警亦覃肆赦之恩征賦已輕更令
蠲復徵償至寡咸許復除天波蕩滌以無遺王道垣
夷而有截勲庸先賞勞効均酬俾人敦修睦之風命

之封蔭延世舉卹孤之典榮以存亡加以矜寬居作
之人牽復左遷之吏和氣周物祥光麗天所以歷授
人時遂故雍熙之號禮成樂備仁封禪之儀臣限
權六條方遙雙闕不獲奔詣玉階無任歌樂聖抃蹈
激切屏營之至

賀南郊赦表

蔡君謨

臣襄言今月二十三日馬遞到赦書一道以南郊禮
一作事畢大赦天下者臣當時集本州官吏及僧道軍

民等宣布并行下屬管十縣訖圓丘致饗講修對越
之儀大宥推仁覃霈汪洋之澤含生至一作垂眾仰忭

一作抹同歸臣襄中謝竊以因吉上曰郊稱大事者祀

粵自虞夏迄于漢唐有質有文或沿或革諸儒參議
致謂六天而異名歷代所行止以三年而定禮必於
至者取物成之大備就乎陽者法天道之資生然而
千官備儀百靈走職發揮往制必屬于昌辰憲法後
上允歸於元聖恭惟皇帝陛下順考古道丕開大

猷懷翼翼之心昭事上帝秉烝烝之孝祇見祖宗宿
于清淨之宮致此精明之意人神降格海宇歡呼回
六玉之珍虬御雙雲之華闕與民更始大覃雷雨之
恩置國無窮永享華夷之樂臣親逢盛際向忝近司
方領寄于藩垣但驚精於宸極

賀南郊赦表

曾子固

今月初七日遽到赦書一道以十一月二十七日南
郊禮畢大赦天下者臣已集軍府官吏將校軍民等

宣讀訖伏以人之所歸者莫如德天之所享者在于

誠其惟聖王克有全美

中賀伏惟

皇帝陛下聰明

稽古承繼祖宗慈惠愛人撫臨邦國有徧覆并容之
大度有防微慎獨之小心不從遊畋不近聲色無紛
華盛麗之好無便辟側媚之私歲時吉蠲以承七廟
左右順適以奉兩宮其功施于仁效見于事則宅仁
由義縉紳之徒成材于學校超距塌鞠熊羆之旅養
勇于營屯甌窶汚邪之收充于倉廩關石和鈞之利

阜於市廛家有豫樂之聲人無愁怨之色協氣所召
休應自殊鈞陳太微星緯咸若崑崙渤澥波濤不驚
近則金石之聲鳥獸忻蹈遠則干羽之舞蠻夷駿奔
象齒旅於闕庭龍媒納於閑廐是謂六府三事皆可
以歌四海九州罔不率俾蓋巍巍而特起非瑣瑣之
能闢前世議太山之封謀梁父之禪者度崇比大疇
克登茲陛下抑而不圖謙以自牧以謂先后創業垂
統其功莫得而名上帝隕祉發祥其德無可以稱思

所以報一本于心故寅畏嚴恭積之有素而齊民薰
被進而益虔在於物者不取其煩盡諸已者必求其
實是以蕭光之烈奏於宗祊柴燎之蒸焜於郊兆幽
隱昭答神靈顧懷無疆惟休方寔昌于萬世不敢專
享故敷錫于羣元稽參典彙定著赦令弛張從理同
異稱情蠲罪青而棄遐疵錄勞能而縱逋負顯晦咸
暨洪纖不遺莫國之歡既交于冲漠一人之慶遂及
于蛟螭孚于上下之間極乎帝王之盛臣被學最舊

蒙恩寔深莫侍甘泉之祠獨歎周南之滯第從臣之
嘉頌未效薄材望屬車之清塵但馳遠思

賀南郊赦表

余安道

臣某言今月十六日馬遞赦書一道至邕州以十一
月四日南郊禮畢大赦天下者當時集本州官吏軍
民等對眾宣示依例施行訖昭事上帝式遵大報之
儀敷錫庶民庸洽來同之福中謝恭惟皇帝陛下
接千歲之統逆三神之釐震威九區化覃萬寓偃閑

師節宣揚淳風年穀屢豐瑞典不絕玉幣涓潔虔事
天之誠壇廟肅祇兼嚮親之孝膺天地之貺故二儀
合祭而有嚴承祖宗之休故三聖偕侑而為始禮文
樂具物遂時康均此純禧霈然諸夏神明來格求福
不回瑕穢蕩清與民更始至于斥去告訐裁減賦租
誠誅求之官釋逋負之責斯皆講盛德之事隆太平
之基凡有歡呼萬邦同泰臣伏限守職邊郡不獲抃
蹈闕庭臣無任

賀祀后土禮畢赦表

張乖崖

臣某言今日日密院遞到祀后土禮畢赦書一道臣
當時集軍官州吏僧道百姓宣諭訖希世盛事作解
鴻恩歡洽之聲隱然雷動均和之氣邈與春迴中謝
臣聞汾睢上準坤儀中宅自漢王之覩奧復唐后以
致誠年祀寔遙聲嚮都絕蓋戈旄之未偃而黎獻之
未康雖欲在思實則罔暇恭以 太祖皇帝沉謀英
斷應天順人西取三川南定百越荆蠻既乂江吳以

朝 太宗皇帝天資聖文神贊明德挫并州之逆節
旌浙右之忠渙於以躬選惟良生理中道可久之業無
得而名伏惟 皇帝陛下繼體承乾祖仁照義好聞
正直樂事謙和以唐虞濟物之心下安率土以周孔
治時之法上守慶基遂致風教大和天人合慶沙漠
難羈之虜不召而來天書莫測之祥應期而出躋生
民于富壽見昌世之形容一之日封泰山禪社首功
之至也二之日幸汾陰祀后土禮之得也大恩四出

覺萬有以重熙溢美無窮真聖人之能事臣久塵要職獲守維藩前導後從既無階于扈蹕式歌且舞徒有幸于逢時云云

賀大赦表

田表聖

臣錫言臣 月十四日伏覩制書大赦天下者伏以聖德廣大鴻名昭彰報功于天推恩遠下登渙汗之大號示乾健之垂文慶賞兼行 並釋覆載之內

歡呼畢同

中謝臣聞郊祀天地配享祖宗孝莫大于

斯禮莫盛于此伏惟 崇文廣武聖明仁孝皇帝陛

下紹登寶位繼守皇圖英睿稟于自然仁和發于至性三載恭默萬方平盥示慈惠則刪約條科念忠賢則委用耆舊文德在省禮樂居先武功其神暴亂自弭以一陽來復有事于南郊肆赦遠行宣令于北闕夕偏天下先陽春而布和風行域中與品物而更始釋放刑禁矜寬過尤蠲復祖徵招懷違叛勲勞先賞遺滯旁求惠孚悃嫠恩加存沒合天波之蕩滌同壽

域之躋升鳳儀九成方樂昇平之化山呼萬歲仙觀
封禪之儀臣恭守詔條遠在淮表執籩豆而侍祠祭
就列無由傾葵藿而仰照臨馳誠但切

賀明堂赦表

蘇子瞻

宗祀告成修累朝之盛典端門肆青荅萬宇之歡心
凡有識知舉增抃躍中賀竊謂祖宗恩信之所被譬
如天地寒暑之不差將推作解之仁必在當郊之歲
恭惟 皇帝陛下憲章六聖左右三靈上帝眷而風

雨時壬人去而蠻夷服講明大禮對越昊天懷柔百
神嚮用五福大河修復奏軌道於東流藩邸顧懷錫
鴻名於西府臣備員法從待罪守臣想聞路寢之鼓
鐘曾叨奉引嘉與海隅之草木同被恩私

賀明堂赦表

蘇子瞻

嚴配禮成民皆知孝好生德洽天下歸仁凡蒙一洗
之恩舉有惟新之喜中賀伏以功存廟社而辭其禮
德及草木而諱其名此聖人之所難幸微生之親見

恭惟 太皇太后陛下勲高任妙道配唐虞顧惟致
治於和平孰不歸心於保佑合宮均福畢修累聖之
文會慶告成不居先后之位臣職叨禁從身遠闕庭
既欣渙汗之私傳霑動植更喜謙光之美獨冠古今

賀明堂赦表

曾子固

奉參聖考升配上天秩盛禮於法宮推大恩於率土
中賀伏以 皇帝陛下有聰明好古之質有恭儉愛
人之誠兢畏萬幾仔肩一德欽柴展報既昭告於元

功嚴父致隆又推明於極孝越成釐事均布神休草
木昆蟲皆令受賜華夏蠻貊莫不歸心臣心係北長
身縻東土永懷故事難求汶上之圖歸遠清塵方歎
周南之滯

賀明堂赦表

孫仲益

禮成宗祀修累聖之彌文恩錫庶邦廣穹昊之景福
一洗寰區之青舉霑曠蕩之恩 皇帝陛下祇燕孫
謀紹隆明德雖四方之虞求靖而三歲之典弗違上

以對越在天之靈下以浹洽好生之德豈止欲囹圄
空虛而謹罰庶幾俾盜賊向化而革心臣率祇吏民
布宣德意想縟儀於路寢莫預駿奔均慶賚於海隅
共欣渙汗

賀明堂赦表

張文潛

伏以宗祀于明堂既盡寅恭之志大賚于四海徧覃
在宥之仁凡出照臨悉周惠澤恭惟 皇帝陛下堯
仁若日舜孝格天法度修明既聿追于先烈號令寬

厚已深結于民心肆時大亨於合宮是謂嚴親之盛
節禮成有慶既賚予于善人德及無疆將陳常于時
夏興哀多罪囹圄渙然一空頒錫六師忠勇為之十
倍丕冒出日罔不嚮風洪惟盛朝集此熙事臣職司
牧養責在承宣敢不撫陛下可封之民鎮以無事布
陛下維新之惠期在措刑

賀明堂肆赦表

蘇子由

饗帝尊親古今之大典推恩肆眚天地之至仁舉此

盛儀併在今日 中賀伏惟 皇帝陛下以仁御世以
誠事天乾清坤寧兵戢民阜人悅故神罔不宥物備
故禮得以成一享園丘三謁路寢誠敬之心與日並
茂寬大之澤無物不蒙能事既修全福自至方將享
堯舜之上壽膺成康之令名民願所同天心自若臣
頃侍帷幄稍厯歲時譴責之深坐甘沒齒江湖之遠
猶冀首丘久蟄泥塗聞震雷而惕若深囚籠檻得清
風而自疑

賀明堂肆赦表

曾文昭

侑帝饗親既全聲而玉振赦過宥罪遂雷動以風行
歡聲達于幅員協氣充乎上下竊以躬事天之禮莫
如王者之堂極嚴父之心是謂聖人之孝講茲鉅典
屬在熙朝即路寢以親祠兆於仁祖黜五精之並祭
斷自神宗光昭前聞啟迪後嗣恭惟 皇帝陛下紹
膺寶命祇適先猷平成百度而不有其功覆載羣生
而不尸其德謂時和歲豐之效乃高穹顧諟而然謂

刑清武偃之祥乃七廟威靈所致矧屬承祧之始永
懷濡露之恩且申報本之誠且展事生之道以祭恐
數而瀆故遵三歲之期以郊則遠而疏故度九筵之
位季秋令月吉日上辛備法駕之儀協雅聲之奏牲
牲博碩籩豆靜嘉元龜大輅之旅陳篆轂錯衡之輻
輳并柯共祗按圖牒而充庭鬻首貫胸衽衣冠而就
列以引以翼有壬有林奠珪幣以告虔舞羽旄而象
德靈心合答精意感通嘉得四海之歡增受萬年之

策尚念有司之庶獄豈無弗獲之一夫乃御端闈亟
敷大號滌瑕蕩穢已責逮鰥空狴犴而縱縲囚開府
庫以賜軍士布慶施德昭天漏泉彼泣辜弛網之仁
推食解衣之惠方之於此不其狹歟臣忝綴從班適
分州寄莫與奉璋之列徒懷拱極之心

聖宋名賢五百家播芳太全文粹卷七終

聖宋名賢五百家播芳太全文粹卷八

賀表

賀裕享赦表

余安道

臣某言今月十六日准樞密院遞到裕享禮畢大赦
一道當時集官吏軍民宣示施行訖宗祊誌祀講墮
典以親行雷雨湛恩匝縣區而普及軍民竦踊中外
歡呼中謝伏以國家祚稟赤精運興累聖藝祖題期
而立極神宗奕葉以承休迨文考之握樞至太平而

輯化並垂千古之餘烈此皆百世而不祧恭惟 皇
帝陛下祇適先猷大夏諸夏固嘗備潔牲玉奉見郊
丘啟八陛之壇答二儀之貺侑三聖于上帝祔羣后
于闕宮親籍田之耕配明堂之享惟茲合食之盛祭
久委有司之攝行舉是濶儀允為大典辨昭穆之序
正乎東向之尊均賑膳之禧表乎祀事之重漢詔寬
大齊民樂康減賦罷徵乃人心之至願恤災宥過實
王政之所先垂髻盡識于昇平戴白同懷于悅豫臣

無任

賀登極肆赦表

陳君舉

惟帝出震與物為春在舜紹堯青災肆赦爰孚大號
實本舊章 中謝恭惟 皇帝陛下誠足以格幽明德
足以侔高厚養以天下嗣萬世無疆之休洽于民心
思匹夫不被其澤聿觀載籍具在典儀周有太賚蓋
惟初基漢與更始但為故事未有重規疊矩一視同
仁率循繼照之初備舉好生之典臣遭時華旦假守

遐方葵藿傾陽式謹朝宗之義蓼蕭零露敢忘滂漉之恩

賀登極肆赦表

許仲啟

歷數在躬既承於舜禪雷雨作解初廣被於周封仰止重熙集茲大順中賀恭惟皇帝陛下仁兼天覆量極海涵奉鬯東闈俾羣黎陰受其福凝旒南陸將萬彙各得其宜禮崇揖遜之餘澤茂龐鴻之後削三章於筆下不但刪煩運八柄於寰中莫先馭幸臣

撫摩攸寄曠蕩是逢壽域四開欲封吏民而鼓舞化基一立諒移風俗之權輿

賀曲赦表

余安道

臣某言今月初一日馬遞赦書一道至安撫司以殺獲蠻寇收復邕州曲赦廣南東西路者登時同官吏集眾宣示軍民依例施行訖狂蠻竊發遽騷嶺海之邦度彙重蘇遠沾雷雨之澤中謝伏以國家接千歲之統擁百神之休一六合而同風重九譯而脩贄蠢

然獠族素附交城父為戮而不悛母同惡而增酷廣
招亡叛庸濟狡兇窺邊隙以漸深極兵鋒而為暴遠
趨南海戈鋌肆掠于越郊還據兩江文檄徧邀于黃
洞妾祈枝附潛覬土疆 王怒以遣師輟樞臣而總
律顧茲烏合未測天亡初居井以自深俄當輟而來
拒犬羊雖眾聿成膏斧之誅羽翼先摧遂起焚巢之
計既已驅除醜類恢斥邊關捷布繼聞德音遽霽念
深黎庶懼此憫凶特推恢大之恩仍協發生之候此

蓋 皇帝陛下乾剛下濟天惠周施澤兼被于存亡
民用忘于疲瘵拯其焚溺匝南夏而永康育以慈和
與萬方而同泰臣無任

賀德音表

田表聖

臣錫言今月九日遞中刑部牒連到德音釋放罪戾
及蠲免逋欠招懷違叛旌舉勞能者已畫時施行申
奏訖伏以漢殿凝旒百辟慶朝元之禮舜弦應律萬
方覃在宥之恩凡仰照臨孰不慶抃 中謝 臣聞順時

布令必欽若于典章視朔臨軒宜普行于恩澤伏惟
崇文廣武聖明仁孝皇帝陛下動天以德守位以
仁建中于民推恩待下金玉必貞于王度地天交泰
于昌期以月紀蕤賓日當初吉袞冕升太微之座星
辰羅拱極之班君臣會朝盛禮斯畢雷雨作解恩制
遂行歡聲遐徧于八紘喜氣盡浮于雙闕德音所至庶
獄咸空惠渥旁流逋租盡釋卹滯淹則吏員減選示
綏懷則冠盜攸歸捐軀為國者存歿霑恩抱器懷才

者薦揚有自風行北上既符發號之文雲起封中位
慶告成之禮臣謬膺朝寄遠奉詔條星霜再周未展
涓埃之効軒墀久別但傾葵藿之心

賀德音表

田表聖

臣錫言今月二十一日刑部連到德音已晝時施行
訖伏以絲綸作解之恩非時霽霈華夷至和之感向
日歡呼中謝伏惟 皇帝陛下神道知幾文明以理

金玉必貞于王度機衡以奉於天時宜乎二儀萬靈

祥瑞交薦五風十雨稼穡屢豐所以答上帝之高明
思下民之勞苦念其闕乏或貨以餘糧卹其罪辜或
省乎庶獄尚踈法網用滌恩波取連山宥罪之文行
出紓青災之令重刑減降殘賊蠲除仍寬聚嘯之徒
俾啟自新之路人心感悅春雲護肅殺之威帝德昭
宣秋日麗清光之彩臣忝分憂寄方遠丹墀臣無任
抃蹈激切屏營之至

賀德音表

臣錫言今月九日夜遞中刑部牒連到德音減降釋
放罪戾者伏以歲時更始制旨惟新協陽春以布和
與品彙以覃慶凡在臨照孰不歡呼中謝伏惟 崇
文廣武聖明仁孝皇帝陛下為政以德守位曰仁明
義以禁于民非推恩式致于刑措是以號令渙發當
王正視朔之辰動植咸亨應天道施生之候詔命朝
出寰區夕周重刑遞降于徒流輕罪悉從于釋放山
林聚集之盜容以歸還城池失守之臣許令引見物

情舒泰聖德融明躋人于仁壽之區致理成升平之
化臣忝分符竹屢換星霜近奉詔書即歸月闕拜聽
德音之宣諭躬先士庶以歡呼仰聖人之道如日中
慶王者之恩及天下臣無任抃蹈激切屏營之至

賀德音表

余安道

臣某言准尚書刑部牒准皇祐六年三月十七日德
音政皇祐六年為至和元年應四京及諸道州府軍
監縣等見禁罪人限德音到日死罪降徒流流罪已

下並放當時軍州官吏軍民宣示施行訖先天布令
以召四時之和罪已興言特引萬方之過邦刑是恤

聖德惟新

中謝

竊以日月之行罔違常數天人之意

以感至誠永言合朔之期或偶二交之次遂成虧薄
著驗經纏榮社貴陰春秋之故事避寢脩政帝王之
舊規恭惟 皇帝陛下道迪大中志深寅畏因三辰
之示變詔六職以修方特推汪濊之恩躬行消復之
要渙紀元之大號期敷祐于羣生更也之明兆民共

仰霈然之澤函夏同懽臣伏限守職邊郡不獲抃蹈
闕庭臣無任

賀恤刑表

張全真

秉籙御天屬聖神之在運對時育物均雨露以布慈
繫畏景之方隆閔祥刑之未措上嬰宸慮渙發詔音
邈及遠方一清幽圉中賀竊以泣辜流念見大禹之
至仁扇暘軫懷仰周文之懿範欽惟前躅垂裕後王
於皇本朝比跡震古恭惟 皇帝陛下堯仁冒遠舜

智燭幽微躋羣物於大和不忍一夫之失所故雷號
風令期四海於無刑玉律金科庶有生之難化蠢茲
未革尚干有司惟深惻於炎敲重自罹於囚繫或匪
惟良之吏必興慘獄之嗟特頒細札之丁寧痛喻守
臣以欽恤臣敢不俯勤夙夜仰副哀矜播厥官僚謹
茲訟獄職惟宣化躬佩服於訓詞國無冤民庶導迎
於善氣

賀獄空表

趙承一

好生之心本天地之大德措刑之效乃帝王之極功
茂實頻仍輿情踴躍中賀竊以順德在大金石或至
於焦流南風之薰黎庶相趨而悅懌夏日可畏也如
此聖人於刑曰恤哉然而扇暵之勞既垂於博施泣
辜之感徒厚於責躬曾未若更三伏以在辰獄一夫
之無有古寥寥其鮮矣今數數而見之此蓋伏遇
皇帝陛下外布湯寬中勤舜察欽若丹書之慎惻然
赤子之憐既摩義以漸仁因遷善而遠罪克底勝殘

之績屢彰首善之民臣方蔭雲天詎施涓勺茲用憑
於帝力不犯有司雖無德於都人式歌且舞

賀上元獄空及不拾遺表

春元三五之朝民無犯法王畿眾人之所路莫拾遺
凡履地以戴天皆舞手而蹈足中賀竊以俗係時而
薄厚性因習以汙隆空固歷年周成王乃能去殺遺
金當道樂羊子其猶動心矧都邑方盛於遨遊而車
馬相追於暮夜向隅或泣不樂將致於滿堂以閤而

投所盼固多於明月而乃盡虛囚繫爭効寶珍臣庶
式訛莫麗臯陶之罰懦貪相勉競慕伯夷之風昔未
聞之今方創見此蓋伏遇 皇帝陛下聖恩丕冒神
化旁流刑本期於無刑信未施而已信頑囂感格廉
恥興行既首善於京師將純被於天下躋諸壽域登
以春臺臣猥被缺員誤當劇任甫閱政條之頃仰蒙
帝力之深何以鞭笞莫措趙張之術幸觀輦轂悉為
堯舜之眚

賀獄空表

堯舜性仁民日遷善成康刑措史不絕書凡有耳目
之見聞不勝手足之舞蹈 中賀竊以中都浩穰在正
辟以尤難長夏鬱蒸雖佚居而猶病無有一人之獄
適丁千載之期恭惟 皇帝陛下獨運離明躬行乾
健如曰不辜之殺寔失不經推吾所愛之人及其不
愛曾旬月之未幾致囹圄之屢空逮於畿 之間舉
絕縲紲之繫符瑞數興於草木貨財恥拾於道塗歷

春夏以滋多累百千而未已臣獲寬吏責仰冒天功
得以駕鈍之姿坐承嘉美之化沈朱李於寒水共樂
清時鞠茂草於園扉殊多暇日

賀獄空表

至德洞天雨澤宵降深仁逮下囹圄盡空道本於
聖神福乃歸於黎庶歡聲盈耳和氣塞朝中賀竊以
四十年而無刑周昔盛矣千餘歲而復古宋今繼之
偶春序之愆陽軫帝居之旰食躬紆寶墨之妙救無

庶獄之留詔札未乾雲霓奔走綸言既布田野霑濡
致輦轂以肅然無縲紲之繫者逮於甸服陶我皇風
六邑陳狴犴之靈三縣落草木之瑞好義益興於鄴
鄙拾遺爭効於貨財嘗舊史之傳聞迺此日而親見
此蓋伏遇 皇帝陛下順帝之則與天為徒以文王
之小心急虞舜之先務雖奏讞之委曲未始忽忘至
斷弊之錙銖類從未減民識知於惻怛俗愧恥於頑
囂故於憲章靡所抵冒臣猥尸官事莫措吏能鈎距

無奇敢比蹤於廣漢折揚不用幸息謗於莊周

代大理寺卿賀斷絕奏案表 張全真

不令而行黎民於變有恥且格比屋可封曾無請讞
之辭或下平亭之吏頌聲交作協氣旁流中賀竊以
作律止于九章示簡用懲于密網求情必以五聽致
詳懼失于單辭尤謹罪疑更從中覆惟上聖以列用
中罰而斯民不犯于有司咸蹈四維自忘五過下逮
八荒之遠亦停三覆之煩置辭既息于郵傳當罪不

勞于吏議事無倥偬日以舒長恭惟 皇帝陛下端
命穆清宅心昭曠治具明于畫一化工協于登三放
德而行物被昭天之施惟刑之恤獄無畫地之譏致
囚繫之屢空亶刑章之幾措臣等獲承嘉會親覩極
功絕筆丹書安用惠文之彈 青史下卑宣室
之齋居

賀大朝會表

葉少蘊

宸心抑畏曠盛典而弗居羣議載揚幸戎兵之始間

是為周禮豈惟漢儀臣某中賀恭惟皇帝陛下基命昊天紹休文祖惟聰明睿智而不殺故能服天下無所用威既艱難險阻之備嘗則必履帝位以大居正象路在鐘簋畢陳湛露惟晞共仰朝陽之盛橫流式遏敢忘巨海之歸臣假守外藩獲逢熙事五侯奉幣濫居邦甸之光萬壽稱觴莫預公王之末永懷魏闕徒渴愚衷

賀籍田表

趙德莊

農祥神正調元氣於孟春天官景從乘時龍於千畝肇新容典翕受純禧中賀竊以祈黍稷以勸耕共粢盛而教孝晚周殘缺禮不見者百王炎漢熙然詔始行於三世自時厥後曠代僅存職既失於甸師論多淆於博士若稽治古繫我太宗規吉壤於朝陽標紀元於端拱遙追來孝載更累聖之傳講議洽聞允屬中興之運順導東郊之令躬勤南面之尊出種桂於掖廷肅門閭於宮正紺轅黛耜駐天步於青城華蓋

金根旋日輪於黃道神靈降格樂奏洽和迄成貴賤
之班式懋耘耔之勸恭惟 皇帝陛下敦修太本蒐
舉懿文斷採教民世仰神農之聖饒賓分命人知堯
帝之心於昭親率之人益顯太平之盛臣拘縻外守
阻望清光播穀惟時遐想載芟之什力田可舉願賡
宣布之詩

賀籍田表

孟陬協紀方欽授於人時太史戒期爰躬耕於常籍

有嚴熙事茂輯純休中賀竊以天田九星象箸耘耔

之應農輿三蓋禮為恭儉之先考周制以僅存求漢
章而既邈永平鼎盛徒賜食之有聞開元亟行始進
儀之粗見共惟皇祖丕闡禋容建崇禮之通門敬思
文之秘宇作為元紀敷錫宥恩事皆集於大成謀遂
貽於繼聖恭惟 皇帝陛下勤勞稼穡損益古今鬱
浚實彞儼朱絃而祇袂洪縻在手撫縹輓以周旋既
屈帝者之尊益明天下之本然茲懿典罕值中興號

公之諫永世以貽譏憲宗之儀半塗而弗舉光於往冊獨我泰辰臣叩命江湖馳神觀闕棗盛醴酪仰宗廟之孝思黍稷稻粱助田疇之慶賴

賀籍田表

表壇祗祓儼萬乘以尊臨黛耜爰興舉三推而躬勸歡傳華旦風動綿區竊以籍乃借民周雅述載芟之訓冕而從事戴經垂秉耒之辭不惟敦龐純固於是乎成抑亦醴酪棗盛由此而出考之往牒具有明文

故孝武明詔於東郊章帝親巡於懷縣豈止一時之稱美實為千古之流光挺上聖之中興條緝儀而肇舉凡居涵覆孰不欣愉恭惟 皇帝陛下大德時乘多能天縱盡挽雲間之河漢洗空天下之干戈南北交通書文混一肆念黎元之眾未知稼穡之艱爰擇元臣用勤終畝丕顯先農之祀於昭重穀之誠千耦其耘共慶康功之即萬邦無懌永歌嗣歲之興某叨守偏方幸觀盛事書頌一札已聞天語之丁寧麥秀

兩岐願繼前賢之彷彿

賀安南班師表

臣某言伏覩廣西荆湖路安撫使司劄子已克伏交趾了當班師者擴俗亂常敢干天討偏師問罪深入塞庭戮其酋豪拓我疆土歡傾萬宇威懾四夷中賀竊以安南一方輿地千里世受爵寵列為翰藩屬傳嗣之童昏有擅權之姦慝遽為畔援自取滅亡迺申命於虎臣俾肅將於師律運籌決勝受神算於廟堂

折馘執俘獻凱歌於宗社或儔功於不日邁振古以無前此蓋伏遇 皇帝陛下大智日躋沉機天縱赫然一怒舉必萬全詠采芑之南征固無慙德勞出車之還率亟有膚公豈惟底定於遐荒抑足震驚於戎虜

賀兩川賊平表

張乖崖

臣某言今得鈐轄進奏院告報寄班供奉官安守忠到闕奏十月三日富順監與賊相見一合殺下賊軍

斫到王均首級掩殺招降到賊人草補人員共六千
餘人其賊並以剪除靜盡者臣當時集軍州官吏僧
道百姓曉諭訖小醜亂常偏師致討尋聞就戮大快
羣情中謝竊以太祖開基廣之以教導太宗臨
極益之以慈仁萬方浹洽于皇恩百姓不知于日用
恭以皇帝陛下道光先志化被無垠含氣遂生如
逢于煦日行歌載路兵贊于昌時而獨王均愚不畏
天飽思吠主扇搖兇黨搔動邊城皇帝陛下猶示

招綏冀其悔悟迷而不復有煩問罪之師困極斯逃
方信滅身之禍雖將臣之宣力由英主之授謀四海
一心同慶于此臣叨塵班院獲守藩方誠無執銳之
勤實愜除奸之願云云

賀高陽官路破賊表

楊文公

臣某言得進奏院報前月二十四日鎮定高陽關馬
步軍都部署傅潛等差侍禁郭筠齋到狀奏稱九月
十七日先鋒使田紹斌差人報楊嗣石普殺下番賊

二千餘人斫到賊頭五百个奪到馬五百匹衣甲器
械不少者蠢爾兇渠敢犯邊境靈誅所及醜類以殲
克傳三捷之音實賴一人之慶臣某 中謝 臣聞疆場
之事用備不虞金革之興蓋非獲已而况並建萬國
守在四夷崇山之阿或蟻壤之斯漏隆車之轍猶螳
臂之敢張舞干雖示于懷徠祝網豈容于越逸是用
西藩命將北落徽師授以廟謀 行天討兵鋒未接
豺狼尚肆於無厭湯沐既陳畿甌果聞于相弔渠魁

折北餘黨橐原斬馘擒俘已倍雲中之級投戈棄甲
更齊熊耳之山獲冀馬以穀量表胡庭之運盡此蓋
皇帝陛下道符天錫化比神馳搏俎折衝懸知于
千里邊陲息警將自于一戎仁收督亢之圖便勒燕
然之右克清朔漢永洽承平臣忝備諫垣遠分憂寄
明庭獻捷阻聞振凱之音宣室策勲不在稱觴之列
歌時戀聖倍萬常情臣無任歡欣激切

賀劍門破賊表

楊文公

臣某臣今月二十七日得本道進奏院狀報近有西
川駐泊神衛右第三軍第二都虞侯王均等為惡作
亂奔衝劍門已據劍門都監裴臻與知州李士衡同
共殺敗者蠱毒甚微敢行稱亂鴟張未幾已覩成擒
兇醜既殲朝野相慶臣某中謝竊以王者之謹關梁
所以備他盜用鈇鉞所以誅叛臣如王均等身率戎
行地親藩衛祿廩優厚賜予便蕃饜飫膏粱被服輕
煖出荷干城之寄曾無汗馬之勞乃敢結構異端協

從羣小苟圖不軌輒負大恩挺狼貪羊狠之謀為鼠
竊狗偷之計天設之險爰肆憑陵鬼得而誅豈容越
軼裴臻等任當要害職在誰何屬蛇豕之興妖乘龜
貅之鼓怒遂摧鋒而奮擊未旋踵以翦除元惡既就
于梟懸餘黨更無于焦類寢皮食肉式快忠義之心
犯門斬關永破姦邪之胆天威所被井絡載宣賞典
聿行輿誦斯愜臣忝分憂寄幸覩捷音慶抃之誠實
邁常品無任云云

賀獲鬼章表

范堯夫

臣某言伏覩熙河經略司奏今月十九日洮東安撫
种誼領兵至洮州擊敗鬼章軍活捉到鬼章者天威
昭赫師律訓齊深入妖巢生致渠首中謝竊以裔夷
小醜獷獸為心蒙被國恩不加報復侵犯邊圉數有
震驚遂敢交通種種羗結為黨與解仇合意伺隙成
謀賊傷屬國之人竊據乘障之地先朝所不恐貫聖
算嘗此留心至于罪稔禍盈天棄神怒偏師纔出元

惡就擒昔高宗鬼方至于三年漢元郅支遠在萬里
而皆斬馘血刃之功率非係頸獻囚之事矧其稽積
歲月勞勩師徒豈如廟略無遺虎臣思奮曾未旬浹
已報翦夷吉語亟聞戎捷交上雪邊人夙昔之憤奪
諸羗前却之心追視古先莫可倫比伏惟 皇帝陛下
下神武天縱睿謀日新任眾材而責成因常德以主
事運陶鈞以獨化其易轉圜覃上仁以大同既思率
服仰繫睿算逮此成功臣等叨領弼諧無裨洪造奉

承嘉慶徒切歡愉臣某等無任

賀生擒儂智高母表

余安道

臣某言十月二十四日于大理國特磨道生擒到蠻賊儂智高母偽稱太后阿儂并弟儂智光男儂繼宗儂繼封等尋差管押于今月初五日起離邕州赴關去訖皇化遠覃道九譯而無外天誅所及雖萬里而必擒中謝伏以國家三聖開基千歲接統鬼區請吏海表同文嗟彼蠢蠻產茲悍婦會于凶族濟以姦謀

篡父黨以假權屠子壻而兼土自開邑部靡識君師習為豺狼遂生蛇豕去附庸之舊壤并旁邑之小區侵軼省封偷延歲律邊臣罔上不以實聞冠孽野心因之內侮以至燔毀郡縣係虜吏民東剽番禺北窺桂象屢徼王命圖據邊關所賴者睿算受成樞臣總律犬羊之眾迎刃而亡禽鳥之驚棄巢而遁永言夷域絕異華風毒霧鬱而上蒸銳族艱于深入假辯士之緩頰誘群蠻而協心峒民授甲以赴期寇黨倒戈

而自請眾謀亶集元惡就擒猶託井蛙而自尊豈知
天網之難漏本根既舉枝葉必從眷是災荒漸紓邊
患此蓋 皇帝陛下堯仁天覆漢詔春融恢皇策而
俗既大同疊天威而遠無不聽故得九夷之外聞恩
信以咸來一惡所歸在逃遁而靡隱罔遺寸鏃遂獲
渠魁再請銅柱之郊庸正藁街之戮亮惟朝著同震
懽聲臣伏限守任邊州不獲抃蹈闕庭臣無任

賀誅儂智高母表

余安道

臣某言據本州進奏官申蠻賊儂智高等大理國已
斬除訖奉聖旨阿儂腰斬儂智光儂繼宗繼封各處
斬訖者卉服之蠻敢干國紀藁街之戮用中天誅中

謝 伏以國家道貫百王德涵萬寓東漸西被邈踰堯
禹之封北洽南翔迥溢漢唐之域蠢茲凶族素隸侯
藩嘗竊地以逃來因拒關而弗納而乃贅居邊境盜
弄兵鋒驅掠吏民燔劫郡縣久安之俗聞寇則驚守
長棄城而悉奔士卒投戈而自潰乘此繹騷之勢肆

行僭擬之名母號感星年稱啟歷蹂踐者十二郡屠
害者數萬人還據金湯圖為窟宅繇是睿謀獨斷樞
輔專征廟堂之算有成步騎之師齊進爪牙雖眾當
一戰以皆摧巢穴既傾棄六親而莫保寓所生於假
父之國投孤族子遠夷之君過為巧詐之辭自作偷
生之計殊不知天下共惡神理豈容蠻貊雖遙恩信
可結元凶支黨先從原野之誅頑媪孽童卒伏市朝
之法國章明備式昭雷電之威天網恢疎難漏鯨鯢

之戮四方共快萬口同詞臣伏限遠守郡條不獲蹈
舞闕庭臣無任

賀斬夔離不表

汪彥章

王旅徂征犁庭沙漠種酋就殪函首京師偉哉宗社
之休永矣車書之一消辰大獻罄宇交歡中賀臣伏
以天下為家既靡殊於疆界聖人去惡當務絕於本
根惟犬羊傳襲之區隔日月照臨之造逢時休盛舉
國震驚悉主悉臣來襲漢儀之舊實墉實壑坐觀周

索之同蠹茲遺種之妖敢肆怙終之惡介山溪而負
眾盜名字以欺天爰驅烏合之師力抗鷹揚之旅乃
煩四校之出不遺隻輪之歸既首戮於鯨鯢仍悉除
於蜂蠆征而不戰聊麾荆柄之幡梟以示懲永震藁
街之邸恭惟 皇帝陛下與天同大視古無前運五
季以精神之餘玩四夷於股掌之上雖游魂之倔强
難假息於須臾坐令醜類以寒心常若神兵之在頸
臣側聞盛事阻造外庭登喬嶽以告功雖負史談之

歎斬名王而豐鼓敢忘班固之銘

賀收復熙河等州表

韓魏王

臣某言伏聞熙河路經略司奏修復河岷等州百官
稱賀者隴外數州警天威而率順廷中百辟慶廟算
之惟新凡在幅員畢同欣躍臣某 中謝 伏惟 皇

帝陛下雄材大略高出前王偉蹟閑休夙隆百代雖
內修于文德亦外闡于武功將帥得人闡國蓋踰于
百里臣鄰歸美舉觴咸薦于萬年臣方守郡章阻陪

朝著聽膚公之來上知聖治之日新臣無任云云

百寮賀復熙河路表

王介甫

臣某等言伏覩修復熙河洮泯疊宕等州幅員二千餘里斬獲不順蕃部一萬九千餘人招撫大小蕃族三十餘萬各降附者奮張天兵開斥王土旌旃所指燕及氏羌樓櫓相望誕彌河隴中賀竊以三年鬼方之伐高宗所以濟時六月獫狁之征宣王所以復古政由人舉道與世升伏惟皇帝陛下溫恭而文睿

知以武講周唐之百度拔方虎于一言我陵我阿既飭鷹揚之旅實墉實壑遂平鳥竄之戎用夏變夷以今準古是基新命厥邁往圖臣等均被明恩具膺榮祿接千歲之統適遭會於斯時上萬年之觴敢愆忘於故事臣無任

賀尅復益州表

田表聖

臣錫言十月三十日進奏院報十月八日閣門准樞密院劄子雷有終等奏九月二十日已取下益州城

池入城殺下賊軍三千餘人所有在城百姓並無殺
害已招安訖九日文武臣寮稱賀者伏以聖君御極
當書軌之混同叛卒逆謀怙山川之險阻梟巢既破

已寔凡在照臨孰不慶抃

中謝

伏惟崇文廣武

聖明仁孝皇帝陛下謨猷天縱道德日新至信及于
豚魚深恩被于草木昨以坤維分野民或罹災井絡
妖氛兵因致討成算授之於中禁捷音自至于外區
劍閣先平力州後破王師出如時雨儒臣應于將星

果成克捷之功共樂昇平之慶臣忝分朝寄遠在海
陵關邸吏之飛申已除小寇聞鼎司之入賀盡率具
寮限守土于淮濱阻綴班于闕下誠如葵藿但傾向
日之心迹在江湖空羨朝宗之浪

賀收復益州表

王禹偁

臣某言今日日進奏院狀報雷有終奏收復益州者
臣當時集官吏望闕稱賀并告諭諸縣訖守臣不武
戍卒弄兵暫出偏師果平孤壘

中謝

臣伏觀益部久

樂皇風蕞爾王均敢萌逆節蓋災流于分野致盜據
于城池伏惟尊號皇帝陛下斷在睿謨擢茲儒將雖
依九伐之法特開三面之羅尚敢嬰城斯為迷悞懼
困獸猶鬪之義徵圍兵必闕之文縱以逃遁自今糜
潰盡由聖略永淨坤維臣任忝頌條欣聞捷奏無任
歌時樂聖歡呼蹈舞之至

賀克伏交趾表

曾子固

伏覩進奏院報安南招討司已克伏交趾其首領李

乾德具表乞降者螻蟻之微自投必死乾坤之大終

許更生惟德及其幽遐實慶均于中外

中賀伏惟

皇帝陛下順稽古憲叙正民彝訔聲教於四方一書

文於萬國喑海隅之昧俗肆井底之狂謀聖恩所懷

凶氣自失雕題交趾心服于威靈大輅南金歲遵于

貢職允出止戈之武是稱無敵之仁臣遠守藩維獲

聞捷奏永懷竊抃實倍常情臣伏限職守所拘不獲

稱慶闕庭

賀收祥州表

晁之道

盛德丕冒要荒畢徠地歸版圖人襲冠帶際天無外
揆古有光中賀竊以上主憂民豈私於絕域百蠻
從化或頗識於慕君蓋至仁不得獨遺宜聖世為之
遠撫矜其誠懇錫以寵光肇新郡邑之名適契休祥
之會是為天意豈獨人謀恭惟皇帝陛下經緯聖
文卷舒神武四海從欲而既治九夷不詔而自來致
此殊方列於支郡故封雖遠如瞻咫尺之威歡頌載

新願上萬千之壽

聖宋名賢五百家播芳大全文粹卷八終

